



Government of Samoa

MINISTRY OF NATURAL RESOURCES AND ENVIRONMENT



Level 3, Tui Atua Tupua Tamasese Efi
Building (TATTE), Sogi, P.O Private Bag,
Apia, SAMOA.
Website: <http://www.mnre.gov.ws/>

Telephone: (+685) 67200
Email: environment@mnre.gov.ws

Please address all correspondence to
the Chief Executive Officer, Private
Bag, Apia, Samoa.
Faamolemole faatuatusi uma mai
fesootaiga i le Ōfisa Sili.

Saunoaga Autū
Afioga Palemia, Sui Minisita Matagaluega o Punaoa Faalenatura ma
le Siosiomaga
Honourable Laaulialemalietoa Leuatea Polataivao Fosi Schmidt

Sauniga Aloaia o le Taiala o le Sao Tuufaatasia a Samoa 3.0 mo le
tuuitiitia o aafiaga mai suiga ole tau.

- Susu lau Susuga ile Taitai ole Sauniga, Rev. Denny Epati, EFKS, Saanapu.
- Afifio Minisita ole Kapeneta ma Minisita Lagolago
- Malo Faaloologia ma Paaga Faava-o-Malo
- Paaga galulue, sui o nuu ma afioaga, faalapopotoga tumaoti, pisinisi ma Ofisa ole Malo. Susuga i tofi o nuu faapea sui tamaitai aemaise tupulaga talavou.
- Le mamalu ma le ma'ave eseese ua potopoto mai i lenei afiafi.

Malo le Soifua ma le Lagi e mama! Viia le Atua i lona alofa ma le agalelei ua mafai ona tatou feiloai ma le manuia i lenei afiafi.

E momoli atu le faafetai ile Taitai ole Sauniga, mo le upu faamalosiau, o lea ua tatou faanōnōmanū, sei tō manu mai lagi i le aso ma le faamoemoe. Alofagia e le Alii lau susuga ao feagai ai ma le tau'asuina o le vai ole ola i le nuu oloo aumai ai.

Ae o le auga ma le fa'amoemoe o le asō, ua tatou ofaga potopoto mai, se'i o tatou molimauina se tasi o sao taua a le tatou malo ma le atunuu i le tali atu i suiga o le tau ua iai nei; ua faaulutalaina o le Taiala o Sao Tuufaatasia a Samoa 3.0.

O le sini autu o lenei faamoemoe ina ia mafai ona galulue faatasi atunuu uma o le lalolagi e aofia ai ma atu motu laiti. O Samoa faatasi ma isi atu motu ole Pasefika o loo taulamua i taumafaiga e faaitiitia suiga ma'ale'ale o le tau e pei ona iai le si'isi'i o le sua tai, matagi malolosi, ma le aafiaga o faatoaga i le fesuisuia'i o vaitau o timuga. O nei taumafaiga o loo taulai lea ile faatapula'aina ile 1.5 tikeri le mafanafana ole lalolagi mo se soifua manuia ma le maloloina o tatou tagata ma le siosiomaga.

O fesuisuiaiga o le tau ua iai nei ua tele tausaga o tatou molimauina. Peitai ane, tatou te le o nofoa'i ai ae ua tatou tapenapena i auala e tali atu ai ma faaitiitia ai aafiaga mai suiga ole tau. O lenei sao tuufaatasia a Samoa 3.0, o se taiala ua tuufaatasia ai polokalame a le atunuu faapea taunuuga e moomia ona ausia mo le isi 5 tausaga o lumanai. O le sao foi lea o Samoa i taumafaiga a atunuu ole lalolagi e tuuitiitia suiga ogaoga ole tau.

Ua iai nei lo tatou fa'amoemoe ina ia fa'aitiitia kasa oona e 104.11 kikakalama ile tausaga 2035, fa'alautele vaomatua ma togatogo, siitia le tulaga ole fofoga taumafa ole atunuu, faalautele puipuiga o vaomatua faasao faapea le uunaia o avanoa tutusa mo itupa o alii ma tamaitai faapea i latou o loo iai manaoga faapitoa.

O loo ave foi le fa'amamafa ile puipuiga o tagata lautele ma latou aseta e ala ile toe faaleleia o nofoaga ua faaleagaina poo le siitia foi i nofoaga

saogalemu (Loss and Damage) ona o tulaga maaleale ole tau ua le mafai lava ona tali atu ai atu motu laiti pei o Samoa.

E ui ina laititi le sao o Samoa i kasa oona i le lalolagi ae o loo taulamua ile uunaia ole lalolagi e fai saofaga uma mo se lumanai manuia o tagata uma. O le talosaga ia tatou pa'aga galulue faava-o-malo, ia savavali i a latou tautinoga e ala ile faatupeina o nei fuafuaga uma.

E fai ai a'u ma sui o le Malo o Samoa, e fa'ailo le agaga o le fa'afetai i tatou pa'aga galulue UNDP, Poloketi ole Climate Promise, Global Green Growth Institute ma le NDC Partnership. E momoli atu le faamalo i faalapotopotoga tumaoti, sui o nuu ma afioaga, pisinisi faapea matagaluega a le Malo na saofaga i lenei taumafaiga t'ua.

E ia te au le ava tele, e faamaonia aloaia ai lenei Taiala mo lona faatinoga. Tatou faafetaia ma viia pea le Alii ua taunuu ma le manuia lenei faamoemoe. Tuu ile Atua le faatinoga o lenei Taiala, aua o tatou lava na ole fuafua a o le Alii na te faataunuuina. O lo tatou faavae lena, e manuia ai mea uma tatou te faia aemaise Samoa ma ona tagata.

Soifua ma la Manuia.